



**Ilinniartitaanerup aqqissuusaanera eqaatsoq ataqatigiittorlu qanoq toqqammavilernissaanut apeqquteqaat aallaavigalugu oqallinnissamik siunnersuut**

(Inatsisartunut ilaasortaq Najaaraq Møller, Siumut)

Qujanaq Inatsisartunut ilaasortaq Najaaraq Møller siunnersuuteqarninnut.

Inuiaqatigiinni ilinniartitaanerup qaffasissusaa siuariartortuartariaqarpoq. Tamannalu amerlasoorsuarnik kipisuitsumik aningaasalijuarnermik pisariaqartitsivoq. Meeqqat tamarmik minnerpaamik Meeqqat Atuarfiannit naggataarutaasumik soraarummeersimasariaqarput, innuttaasullu amerlanerpaat inuussutissrsiornermi ilinniagaqalernissamat piginnaanngorsaammik ilinniagaqarsimassallutik. Ilinniagartuujuguni imaluunniit inuussutissarsiutinut tunngasunik ilinniagaqarsimagaanni tamanna apeqqutaanngilaq. Uagutsinnut Demokraatini pingaaruteqarpoq, inuit namminneq ilinniagariumaagartik toqqartassagaat, ajunnginnerpaamillu pikkoriffiit atorluarlugit, tamanna inunnut ataasiakkaanut inuiaqatigiinnullu naleqarnerusussammat.

Nunatta nunarsuarmi nunarsuarmiooqataanaerup annertusiartornerani ilinniagaqassutsillu qaffakkaluttuinnarnerani inissilluarnissaanut ilinniagaqarnek sakkussatta pingaarnersaraat, taamaattuassallunilu. Taamatuttaaq ilinniagaqarnek inuiaqatigiinni atugarissaarfiusumut toqqammaviuvoq, namminerisatsinnillu naalagaaffeqalernissatsinnik sulissutiginninnitsinnut pingaarutillik ilagilluinnarlugu. Ilinniagaqarnerluuna aqcutigalugu, toqqammaviulluinnartunik ilisimasaqalersartugut kingusinnerusukkut immikkut ilisimasariligassatsinnik. Ilinniagaqarnerluuna qaammarsaanerlu aqcutigalugit, inuiaqatigiit tunngaviat paasisallugu ilinniassagipput. Ilinniarnerlu aammalu qaammarsaaneq aqcutigalugit, ilisimasanik piginnaanernillu pissarsisartugut nunarsuarmut ammaassisussanik.

Ilinniagaqarnissamat toqqaanermut atatillugu ilinniagaqalernissamat aqcutissiuussineq suliassaavoq pingaartoq. Meerarpassuaqarpoq inuusuttorpassuaqarlunilu, suli periarfissaminnik ilisimaarinnippallaanngitsunik. Uani pitsaassagaluqaaq, ilinniagaqalernissamat aqcutissiuussisut piffissaqarfisassagaat pingaaruteqarluninartut siunissami pingaarnarpaatut ingerlatatsinni atorfiniffiusussatut aammalu kalaallinik pitsaasunik ilinniarluarsimasunik suliffiusinnaasut ilinniakkat saqqummiuttaqqullugit.

Maannakkorpiaq teknikkikkut ineriartorneq imaannaanngisumik ingerlarsorpoq soorlu assersuutigalugu atortorissaarutit nutaaliat iluanni, aammalu qularutissaanani, atortorissaarutit nutaaliat suliffiit ilaat tigujumaaraat. Suunersut, qassiuinersut aammalu qanoq annertutigisumik ilisimangilarput. Akerlianilli ilisimavarput, siunissami ilinniarluarsimasunik sulisoqarnissaq pisariaqartikkaluttuinnassagipput, sulianik tigusisinnaasut, inunnut atassuteqartussanik assannillu kissalaartunik pisariaqartitsisunik. Uani suliffiit eqqarsaatigaakka soorlu perorsaasut, ilinniartitsisut, peqqissaasut, nakorsat, isumaginninnermik- aamma peqqissutsimut assistentit ilaalu ilanngullugit. Demokraatinut pingaartuuvoq, ilinniakkat suliffinnut



taakkartorneqartunut ilinniagaqalernissaq pilerinartuusariaqartut ukiorpassuarnilu tulliuttuni attanneqarsinnaallutik.

Tassungalu ilutigalugu aamma uannut pingaartuuvoq uparuassallugu, ilinniakkanik kukkusunik peqanngimmat. Ilinniakkat tamarmik naleqarput, tamannalu ataqqissavarput. Imaattunngussanngilagut nuna, ilinniakkanik aalajangersimasunik ammut isiginnittuulluta. Akerlianilli inuit ilinniagaqarsimasut tamaasa nersussavagut, taamaasiornermikkut pingaarutilimmik pilliuteqarmata tamatta siunissami pitsaasumik atugaqarnissatsinnut.

Tassalu Demokraatit oqallinnermut isummersuutaat.